



*Dieu fait descendre le feu du Ciel sur le sacrifice d'Helie, reprouvant
celuy des faux Prophetes de Baal.*

SVIVANT la parole du Seigneur, le Prophete Helie se presenta deuant Achab, lequel voyant Helie, luy dist rudement ; N'es-tu pas celuy qui troubles Israël ? Surquoy Helie respondit, Je n'ay pas trouble Israël, mais c'est toy, & la maison de ton pere, qui auez delaisié les commandemens du Seigneur pour suivre Baal, iusques à quand clocherez-vous des deux costez ; Si le Seigneur est Dieu, suiuez-le. Or suis-je demeuré seul Prophete du Seigneur, & vous auez huit cens cinquante Prophetes de ceux de Baal, & des boccages. Qu'on nous donne deux bœufs, & ceux de Baal sacrifieront l'un, & ie sacrifieray l'autre : Nous ne mettrons point de feu au bois, mais chacun inuquera son Dieu, & le Dieu qui enuoyera le feu du Ciel, soit dit le Dieu de tous, ce qui fut fait. Adonc ceux de Baal furent iusques au soir inuquans Baal pour auoir du feu, dont Helie se mocquant d'eux disoit, Criez, criez, plus haut, vostre Dieu dort par aventure. Puis Helie dist au peuple, Venez avec moy, lequel sacrifia inuquant le Dieu d'Abraham, d'Isaac & d'Israël & deuant tout le peuple le feu descendit du Ciel qui consumma l'holocauste. Adonc le peuple cheut sur la face, & dist ; Le Dieu d'Helie est le Seigneur Dieu, & les Prophetes de Baal furent mis à mort au torrent de Cison.

3. Des Rois 18. Chap.